



Här Claude Wiseler

President vun der Deputéierte Chamber

19, um Krautmaart

L-1728 Lëtzebuerg

Cliärref, de 17. August 2026

Här President,

esou wéi d'Chambersreglement et virgesäit, bieden ech Iech, dës **dréngend** parlamentaresch Fro un den Här Ëmweltminister weiderzeleeden.

E Freideg, de 14. August 2026, ass géint der Mëtteg am "Hohen Venn" an der Belsch e Groussbrand ausgebrach, deem d'Autoritéiten aktuell ëmmer nach an Otem hält. Am Laf vum Samschdeg sinn d'Auswierkunge vun deem Brand och zu Lëtzebuerg ze spiere gewiescht. Samschdes owes war esou z.B. plazeweis am Éislek en däitleche Brandgeroch ze verzechnen, d'Loftqualitéit war deemno beanträchtegt, eppes, wat och visuell wouerzehuele war. Iwwer Nuecht hunn d'Auswierkunge vum Groussbrand däitlech zougeholl, a sonndes moies war op ville Plazen d'Sichtqualitéit däitlech ageschränkt, notamment och am Norde vum Land, an de Brandgeroch war massiv.

Den torfhaltege Buedem, deem am "Hohen Venn" verbrannt ass, setzt Gëftstoffer ewéi Feinstëbs, Kuelemonoxid, Stéckoxiden, Schwiefeldioxid a Kuelewaasserstoff (PAK) fräi, déi nowieslech gesondheetlech Schied kënnen verursaachen.

Déi belsch interregional Ëmweltagence (IRCEL - CELINE) huet gëschter, also e Sonndeg, de 16. August 2026, stënterlech Miessunge verëffentlecht, wat d'Loftqualitéit ugeet, déi en däitleche Risiko am Hibleck op de Feinstëbs uweisen.

Zu Lëtzebuerg ass eng éischt Alerte awer eréischt sonndes um 08:58 Auer publizéiert ginn. E Warnhiweis per SMS, fir d'Fënsteren zouzemaachen, koum eréischt gëschter Owend um 19:55 Auer.

Bis dohi war d'Bevëlkerung plazeweis scho massivem Damp ausgesat, eng Situatioun, déi grad fir krank Mënschen eng Belaaschtung, respektiv geféierlech ka sinn.

An deem Kontext stellen sech dach awer eng ganz Rei Froen am Hibleck op Informatiounspolitik an Transparenz.

Dowéinst wëll ech der Regierung gär dës Froe stellen:

1. Firwat hunn déi national Autoritéiten net méi proaktiv a preventiv iwwer d'Gesondheitsrisiken informéiert, déi mam Brand am "Hohen Venn" verbonne waren?

2. Firwat gouf den LU-Alert-System e Samschdeg eréischt sonndes um 08:58 Auer aktivéiert? Wéi eng Critèren hunn dës Verspéidung gerechtfäerdeg?
3. Firwat goufen eréischt sonndes kuerz viru 15:00 Auer LU-Alert-SMSen un d'Bierger am Norde geschéckt? Firwat um 20:00 Auer nach emol eng LU-Alert-SMS, wou et op eemol heescht „Rauch vorsorglich Fenster schließen“, dat nodeems den Haapt damp tëscht 9:00 a 14:00 Auer am Norde vum Land eriwwegezunn ass? Firwat ass dësen Opruff net an der Haaptbelaaschtungszeit sonndes moies erausgaangen?
4. Op wéi enger wëssenschaftlecher an operationeller Basis gouf den Alarmniveau als einfach Informatioun an net als Gesondheets- oder Ëmweltwarnung agestuuft?
5. Wéi schätzt d'Regierung den allgemenge Risiko an, grad och fir eeler Leit oder krank Mënschen, dee mam Fräisetze vun de sellege Gëftstoffer, virun allem dem däitlech erhéichte Feinstäbs-Wäert, deen déi belsch Ëmweltautoritéit nogewisen huet, verbonnen ass?
6. Wéi eng konkret Moossname goufen ergraff, wuelgemierkt e Samschdeg Owend wéi och e Sonndeg tëscht 9:00 a 15:00 Auer, fir d'Awunner vun de betrouffene Gemengen iwwer déi potenziell Geforen ze informéieren, déi mam Anootme vu Feinstäbs an anere Substanzen verbonne sinn?
7. Firwat gouf keng spezifesch Informatiounscampagne fir vulnerabel Gruppen duerchgefouert, besonnesch fir Kanner, eeler Leit, schwanger Fraen a Leit, déi u respiratoreschen oder kardiovaskuläre Krankheete leiden?
8. Waren an den Ae vun der Regierung d'Informatiounen, déi un d'Ëffentlechkeet weidergeleet goufen, komplett ausräichend, kloer, transparent an zougänglech?
9. Ginn, respektiv goufe während dem Brand systematesch, esou wéi an der Belsch, Loftqualitéitsmiessungen duerchgefouert an d'Resultater lafend a komplett publizéiert?
10. Firwat goufe vun den zoustännegen nationalen Autoritéite bis 19:30 Auer respektiv 20:00 Auer e Sonndeg Owend keng spezifesch Consignen, wat de Schutz vun der Gesondheet am Hëllef op Fräizäitaktivitéiten, d'Belëftung vun Haiser oder de Schutz vu vulnerabele Persounen ugeet, erausginn?
11. Gëtt eng onofhängeg Evaluatioun vun der Gestiou vun dësem Virfall duerchgefouert, fir all d'Mängel bei der Informatiounspolitik an dem Schutz vun der Ëffentlechkeet ze identifizéieren?
12. Wéi eng Lektionen zéien déi national Autoritéiten aus dëser Situatioun, fir d'Gestiou vu méiglechen zukünftege grenzüwwerschreidenden Ëmwelt- a Gesondheetskrisen ze verbesseren?
13. Erkennen déi national Autoritéiten un, datt de Virsiichtsprinzip eng méi séier a méi entscheidend Kommunikatioun mat der Ëffentlechkeet hätt rechtfäerdeg kënnen?
14. Kënnen déi national Autoritéiten de Moment garantéieren, datt et kee kuerz- oder laangfristige Gesondheitsrisiko fir d'Awunner gouf, déi dem Dampf ausgesat waren? Wa jo, op wéi enger wëssenschaftlecher Analyse baséiert dës Ausso?
15. Gesäit d'Regierung am Hëllef op hir Informatiounspolitik, och wat den LU-Alert-System ugeet, e Vertrauensverloscht? Wat jo, wéi wëll d'Regierung dat verluerent Vertrauen erëmgewannen? Wat bedeit dës Virfall fir d'Resilienzstrategie?

Mat déiwem Respekt,

A handwritten signature in blue ink, appearing to read 'Lemaire', with a long horizontal stroke extending to the right.

Michel Lemaire
Deputéierten